

**Kekal sokong Tun Mahathir, Anwar jadi PM lepas 2 tahun – PKR**  
**Astro Awani**  
**24 Februari 2019**

**KUALA LUMPUR:** Parti Keadilan Rakyat (PKR) menegaskan bahawa pendirian parti itu kekal dan tidak berubah dalam menyokong Tun Dr Mahathir Mohamad sebagai Perdana Menteri.

Dalam satu kenyataan, Majlis Pimpinan Pusat PKR turut menegaskan bahawa seluruh kekuatan parti perlu disalurkan ke arah menyokong usaha Kerajaan Pakatan Harapan (PH) untuk mengukuhkan ekonomi dan mengatasi masalah rakyat termasuk isu kos sara hidup.

"Keadilan berpegang teguh kepada persetujuan yang telah dicapai dan diumumkan pada 7 Januari 2018, di mana Tun Dr Mahathir Mohamad diangkat menjadi Perdana Menteri, Datuk Seri Dr Wan Azizah Wan Ismail menjadi Timbalan Perdana Menteri, manakala Datuk Seri Anwar Ibrahim akan mengambil alih sebagai Perdana Menteri ke-8 selepas tempoh 2 tahun.

"Keadilan menegaskan bahawa pendirian parti dalam perkara ini tidak berubah," memetik kenyataan Majlis Pimpinan Pusat PKR selepas mengadakan mesyuarat bulanan hari ini.

Kepimpinan PKR Pusat juga menegaskan perpaduan dan kesepakatan Pakatan Harapan harus dipertahan dan menolak keras segala tohmahan yang cuba melaga-lagakan pimpinan dan melemahkan kerjasama erat dalam kalangan Pakatan Harapan.

**© 2019 Astro Awani Network Sdn. Bhd.**  
**(535275-D) All Rights Reserved.**

Source: <http://www.astroawani.com/berita-malaysia/kekal-sokong-tun-mahathir-anwar-jadi-pm-lepas-2-tahun-pkr-199481>